

Ayera tabata tin un ceremonia di despedida p'e na Corte

Hefe di Griffie Antiyas y Aruba Mr. Baank ta bay cu pensioen



ORANJESTAD(AAN) -- Ayera mainta tabatin un ceremonia special caminda a tuma despedida di hefe di Griffie Antiyas y Aruba mr. Baank, kende despues di a traha 16 aña ta bay cu pensioen.

Redactor di DIARIO a logra di haci un entrevista exclusivo cu mr. A.F. (Fred) Baank pa haya sa con el a experiencia su trabao y kico ta su logronan.

Dia 1 di Juli 1982, mr. Baank a cuminsa traha como Griffier di Corte Superior. Ta asina cu e presidente di Corte Comun di Husticia di e tempo ey, mr. Saleh, a pidi'e pa asumi e responsabilidad aki, cual el a acepta tambe.

Mr. Baank ta hefe di Griffie Antiyas y Aruba y el a splica cu como hefe e mester percura pa e trabao worde haci optimal. Pa logra esey, e personal mester tin un bon edificio pa haci nan trabao y nan posicion huridico mester ta regla.

Mr. Baank ta haya cu cada hende cu ta traha mester sa kico nan por spera pa futuro. Di e forma aki ta motiva nan

pa traha.

Den 16 aña trahando como hefe di Griffie di Antiyas y Aruba mr. Baank a logra e dos puntanan aki pa Antiyas.

Na 1982 a cuminsa cu e renovacion y expansion di e edificio di Corte na Curaçao (Stadhuis). Na 1987 a caba cu tur e trabaonan.

RENOVACION DI STAD-HUIS

Mr. Baank a splica cu na 1982 den e edificio tabatin 8 Juez y un presidente di Corte Comun di Husticia, Ministerio Publico y Procurador General. Awe tin 20 Juez y un presidente di Corte Comun di Husticia.

Esey ta trece cune cu e edificio su espacio a bira limita. Ta pesey mr. Baank a busca un edificio pa muda Ministerio Publico pa di e forma aki haya mas espacio pa e Jueznan. Actualmente ta trahando riba e renovacion di "De Tempel" cu ta un monumento historico den Punda banda di "Stadhuis".

Tambe mr. Baank a percura pa haya un edificio pa establece Procurador General. Ta trahando riba un edificio



cu ta un monumento historico situa den Scharlooweg 13. Door di saca Ministerio Publico y Procurador General for di "Stadhuis" lo haci e edificio uno pa solamente Griffie y e Jueznan.

RENOVACION DI EDIFICIO DI CORTE NA SINT MAARTEN Y BONAIRE

Na Sint Maarten mr. Baank a caba di renova un edificio monumento historico pa un edificio di Corte. Na Bonaire a cuminsa cu trabaonan di renovacion di e monumento historico Fort Oranje cual lo bira e edificio di Corte di Bonaire. Aki un aña Bonaire tin su mesun edificio di Corte.

POSICION HURIDICO NA ANTIYAS

Pa loke ta trata posicion huridico di e trahadoman di Griffie, ta asina cu Gobierno di Antiyas a caba di aproba un raport nobo unda e posicion huridico di tur trahador ta keda regla.

Mr. Baank cu satisfaccion por bisa cu pa Antiyas el a logra tur cos cu el a pone como meta su dilanti. E ta gradici tur instancia cu a yud'e realisa esakinan esta Gobierno di Antiyas y KAPNA.

EDIFICIO DI CORTE NA ARUBA NO TA ADECUA

Pa loke ta trata e situacion na Aruba, mr. Baank a splica cu desde cu Aruba a haya su Status Aparte, e ta hefe ainda pero a laga e mancho den man di Arubianonan pa no crea e impresion cu for di Antiyas ta mancha Griffie di Aruba.

Mr. Baank a indica cu si mira e desaroyo na Aruba caminda casonan den Corte a aumenta, e edificio actual no ta adecua pa un edificio di Corte.

E ta haya cu algo mester sosode pa duna Aruba un edificio digno di Corte.

Kico realmente ta e motibo cu ainda Aruba no tin un edificio di Corte nechi manera mester ta, no ta conoci pero ta un hecho cu algo mester sosode y pronto.

POSICION HURIDICO NA ARUBA

Door di e situacion cu Aruba a haya su Status Aparte, e sistema di gobierno no ta mesun cos o sea no a aplica e raport nobo pa Aruba. Mr. Baank a splica cu e funcion di e personal di Antiyas y Aruba ta mesun cos. E ta haya cu e posicion huridico di Aruba ta regla pero por ta cu e mester worde modifica usando esun cu a introduci na Antiyas como ehempel. E ta dispuesto pa facilita e raport aki pa asina

haci e cambianan si ta necesario den esun di Aruba.

Mr. Baank a elogia e trabao di ing. mr. Maduro cu ta e hefe di Griffie na Aruba. E ta haya cu ing. mr. Maduro a percura pa Corte tin un bon biblioteca cual ta hopi importante.

Ayera tabata e ultimo dia cu mr. Baank a bin Aruba como Griffier di Corte Superior, cual pa practicamente 16 aña largo tur luna e tabata haci. Otro siman lo ta su ultimo bishita na Sint Maarten caminda tambe lo organiza un fiesta di despedida y despues lo mester organiza uno na Curaçao.

Dia 15 di September 1998, mr. Baank ta bay cu pensioen. Dia 17 di Juli e lo bay cu vacation pa despues sigui cu su pensioen. Esey no ta nifica cu mr. Baank no tin nada mas di haci. Banda di e trabao di hefe di Griffie e ta trahando como consehero di Gobierno di Antiyas y ta involvi den renovacion y ehecutacion di diferente proyecto. E ta hinca den e comision encarga cu construccion di e prison nobo na Curaçao y renovacion di e prison actual. DIARIO ta gradici mr. Baank pa e entrevista y ta desee tur clase di exito den futuro.

TELEFONNAN DI DIARIO
826747- FAX 828551